



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma :

Tir Yimyim

tiryimyim@aolima

tir yimyim

TAPAK 8

Injang-bomb ayudak sepai 20 pokset: Cambodia PM

Madrid Open: Nadal aser Iga Swiatek na tasembuba roundi iogo



VOL. XXI ISSUE NO. 196 (ADOK 196)

DIMAPUR TENTONÜ (MONDAY)

RONGCHII (APRIL) 29, 2024

₹ 5.00

Wokha nung transmission tower ka lao



Wokha - Sanis Transmission Line nung tower ka nungi nuts & bolts agizüker aliba noksa nung angur.

Dimapur, April 28, 2024 (TYO): Nisung kari tower osettem auyaba ajanga Wokha - Sanis Transmission Line nung tower AP No. 16 laogo ta Department of Power-i metetdaksü.

April 27, 2024 anepdang Riphyim Old area anasa tower lao aser Department o District Administration-i bushitepa aodang iba tower nung Nuts & Bolts asaa rangzüker auyaba angu, ta Chief Engineer (T&G) Er. Penrithung Yanthan-ashi.

Osettem auyaba ajanga tower lao aser power supply nung timtem agütsüba dang masü saka anameta aliba tower ana tashi laotsüsa kümogo, ta pai ashi.

Iba transmission line ajanga Doyang Hydroelectric Project nungi power abener aser Kohima den sendakteper. Tesüba nunga iba line nung tower balala nungi osettem auyaba aser raksatsüba

ajanga küm aika melapoktet arua liasü, ta Chief Engineer (T&G)-i ashi.

Iba ajanga Kohima ajanga aser Wokha District kübok tesem kar nung power supply mangutsü. Ano Kohima-Wokha Transmission line raksaba ajanga Upper Range, Wokha aser Tsemnyu district nunga power supply nung timtem ajurutsü akok ta paisa ashi.

April 20, 2024 nü Pungro jila anasa 66 kV Double Circuit Transmission Line Tower ka laoba sülen tan ita tsüngda Wokha district nung iba kasa timtem ajuruogo. Iba sendakba nung department-i police tsüngdang FIR ka benokogo aser village councils, civil society organizations aser sendaktepa alirtem dang aibelenertem pua arutsü atema yaritepsü mepishir ta Er. Penrithung Yanthan-isa metetdaksüogo.

Mhachilo Yanthan nem tenüngsang agütsü

Dimapur, April 28, 2024 (TYO): Deputy chief minister Y. Patton aser par kibongi HSLC examination 2024 nung toppe Mhachilo Yanthan nem tenüngsang agütsüogo.

Deobarnü Ikishe village, Chumoukedima nung Y Patton'er kidang Mhachilo nem tenüngsang agütsüba sentong ka agia liasü.

Mhachilo ya Christian Higher Secondary School, Dimapur nungi lir aser lai 593 marks nguteta tematiba takok nguogo.

Mhachilo ya 7th NAP constable Zaremo Yanthan'er jala lir aser tanü la tebu, tetsür Lucy Yanthan aser commandant 7th NAP, Menangmeren nung lia Y Patton aser kinungtsü nati la nem tenüngsang agütsüogo.

Mhachilo-i takok tulu anguba atema kanga pelar aser maneni meranga zünger takok aika angutsü ayongzüker ta Patton-i ashi.

"Mhachilo-i takok anguba ya lar kibong atema dang masü saka Lotha nung er ajak atema konang lir. Mhachilo-i takok anguba ajanga 7th NAP Battalion ajanga nüma tangteter kechiyong la tebu ya 7th NAP Battalion, Bhandari nung mapa lezmüka lir" ta Y Patton-isa ashi.

Dy. CM-isa HSLC aser HSSLC examination 2024 nung toppers aser takok anguba kaketsür ajak nem tenüngsang agütsü.

Mhachilo aser lar tsüraburtemia deputy chief minister, Y. Patton aser par kibong dang pelaba metetdaksü.

Shishilembartemi tanü 'window period' lapoktsür; April 30 nungi shibangtsü

Dimapur, April 28, 2024 (TYO): Confederation of Nagaland Chamber of Commerce & Industry (CNCCI)-i mapang telatet makai mokdangba dak sendakba nung senden ka menogo.

Nagaland state ajungalen nungi shishilembartem ajaki iba sentong pusema nungitba atema CNCCI Chairman-i senden nung pelaba metetdaksü.

CNCCI-isa DCCI dang tarutsü anogotem action plan indang lemsatepsü ashi aser idangji DCCI president-i tensa osang, state cabinet lemtet balala aser District Administration nungi osang angubattem lemsatepa liasü.

Sorkari DCCI takhangba onüktem magizük tashi mesüra külemi mener tenangzüka magi tashi DCCI-i Indefinite Shutter Down magientsü senden nung bangjemtepogo.

DCCI-i akhangba onüktem ya

DCCI atema dang masü saka Nagaland kübok district ajunga den putepa lir anungji CNCCI-i state sorkar maneni rongshitsü senden nungsa lemtetogo.

Iba senden amenba osang CNCCI executive council-i renemshia atatsü atema osang metetdaksütsü mulungtepa liasü.

Naga Council Dimapur (NCD) aser CNCCI-i mepishiba ama DCCI-i Dimapur nung alirtem asoshi asüng, April 29, 2024 anüngdang 12 ako nungi nikongdang 6 ako tashi window period ka agütsütsü lemtetba osang metetdaksüogo.

Ajisüaka, state sorkar nungi telangzüba tajung ka mengura April 30 nungi maneni mapang telatet makai shishilembabaren shibangtsü ta DCCI-i metetdaksüogo.

Maneni, Mokokchung Chamber of Commerce & Industry (MCCI) aser

Chümoukedima Chamber of Commerce & Trade Association (CCCTA)-ia sangdong balala ajanga April 29 nü 'window period' agütsüba osang metetdaksüogo.

April 29, 2024 nü Mokokchung district nung dokan ajak lapoktsü aser April 30 nungi shutter-down tenzüksü ta MCCI-ashi.

Iba mapang public-i petsaprong mesü lijalijongtsü mepishir aser shishilembartemia jenjang tur mayoktsü nenshir. Iba ama mapa inyaker kar putetra temerenshi alitsü aser public-i mobile nos 9436006062, 8415043591, 9436605461 ajanga MCCI nem osang sangoktsütsü akok, ta parnokisa metetdaksüogo.

CCCTA-ia Chümoukedima nung April 29 nü shishilembabaren shibanga agiena atar aser April 30 nungi tenzüksü metetdaksüogo.

Dimapur anasa Borlengri-Block 1 nung ki 46 rongdok

Dimapur, April 28, 2024 (Agencies): Deobarnü Nagaland den arrtsütepa aliba Borlengri-Block 1 nung kitsükkirong lendong tulu ka atalokdang ki 46 tashi mitsü kuma rongdokogo.

Borlengri-Block 1 ya Assam kübok Karbi Anglong district nung lir.

Tanü anüngdang 1:19 ako meta West Fire Station, Dimapur dangi iba osang sangoktsü aser parnoki West aser Central stations nungi fire tenders 2 den mi enseperitem yok.

Tanü nikongdang 3:00 ako tashi nung parnoki miji azüoktet saka iba mapang tashi nung ki

aika rongdoker liasü. Ajisüaka, iba lendong nung nisung yiruba mesüra asüba osangbo kecha mali.

Kitsükkirong lendong ya komaser atalok'ar ano kuli mengutet aser police den mi enseperitemi takoksa anguba osang bushitepar.

Asür Jemtimenba Mollier asükhü lemsateper

Dimapur, Rongchii/April 28 (TYO): Ao Senso tajung, lenir Wb. Jemti Mollier, Kimen, Ao Senso Telongjem Chümoukedima, April 27, 2024 aonung, New Delhi nung akümüli wadang tembangba osang angashia Ao Sendeni kanga sasaset mang ayimer aser asür kibong aser kinunger den asüku lemsateper, ta Ao Senden tir Chubawati Longchar aser tongti zülur Imtipokym nati sangdong ka ajanga ashi.

Pa asüba ajanga asen Ao Senden kübok ASLB/AO RIJU inyakyim nung kechaia melentsü makokba KHUNENTONG tajung ka mekai akümer. Ao Kin Oshoben aser Kaket Ken O zülü wadang nung pai shilem agia aruba mapa tajungtem Ao Kin otsü nungi kodanga maidoktsü, ta Ao Senden sangdong ajanga ashi.

Pa asüba ajanga asen Ao Senden kübok ASLB/AO RIJU inyakyim nung kechaia melentsü makokba KHUNENTONG tajung ka mekai akümer. Ao Kin Oshoben aser Kaket Ken O zülü wadang nung pai shilem agia aruba mapa tajungtem Ao Kin otsü nungi kodanga maidoktsü, ta Ao Senden sangdong ajanga ashi.

Tsüngremi asür kinunger nem alimai magütsütetba anisüngzüük mulungjang agüjangma, aser asür nüla anisüngzükdak yujangma, ta sangdong ajangasa ashi.

New Delhi nung mapang talangka temang anepalua aruba sülen April 27, 2024 nü kü tembar Jemtimenba Mollier asüba mang ayimer, ta Advisor,

Information & Public Relations, Soil & Water Conservation, Imkong L. Imchen-i sangdong ka nung ashi.

Pa ya Nandira Tiamongla Changkija, Retd. Principal Director, Health & Family Welfare kinungbu liasü.

Asür Jemtimenba ya pa sasa yanglutetba nisung ka liasü, shiba kanga timtema pa indang business amenok. Pai pa poksung aayanga liasü aser dangar yaritsü kanga mulungsoa liasü, ta Advisor Imchen-i ashi.

Pai college nung onok külemi azünger Nandira den kibong aküm aser tena temoatsü aliba kibong ka aküm, ta ashi.

Kü tembar Jemtiba kanga kera alima nungi bilatsüsa akumba atema kanga sasar aser pa anojungi asüba ya onok ajak asoshi takoksa tulu lir, ta Advisor Imkong L. Imchen-i ashi.

Mangyimer kibong nung kinungertem nem temulungjang nung tesunepsüba agüjang aser pa tanüla tesunep nung anisüngzükjang ta Tulusang Tsüngrem dang sarasademtsür, ta Advisor-isa ashi.

CM Neiphü Rio-i mangyimer April 27, 2024 nü New Delhi nung Class I Government

Contractor Jemti Ao asüba osang angashia temulung raksar ta CM Neiphü Rio-i asür kinungtsü Dr. Nandira Changkija dangi shidi ka zülüogo.

"Jemti ya takok anguba contractor aser entrepreneur ka dang masü saka philanthropist ka liasü aser pa ya loktiliba asoshi aria bilemba nisung ka liasü. Pai mapa tajung aika inyakba rongnung 2014 küm Ao Naga kaketken o ajungketsü atema 'Jemtimenba Mollier Foundation' tenzüka ya ka lir" ta CM Rio-i ashi.

"Jemti ya kü medemer aser adianu ka ama liasü aser pa asüba ya ni atema takoksa ulura lir. Pai akümüli toktsür aoba ya Naga nung aser talisa Aortem asoshi teyariteper tajung ka samaba lir" ta paisa ashi.

Pai nübortem asoshi mapa tajung inyakbatem bilemteter aser pa ama nisung tajung ka agütsüba atema Tsüngrem dang pelar. Pa senmang tajung maneni alitsü asoshi ni sarasademer. Iba asükhü mapang ozü kibongia asür kibong den asükhü lemsateper aser Tsüngremi nenok sünepjang aser tashi agüjang ta sarasademtsür" ta CM Neiphü Rio-isa ashi.

Khensa yimden-i Wt. Asangla Imti IAS nem konang tetushi agütsü



Khens yimdeni ayongzüka Asangla Imti IAS nem tenüngsang agütsüba sentong nung tongti shilem agirtem külemi tangokba noksa nung angur. Mokokchung, 27th April, 2024

Khensa, April 28 (TYO): Khensa yimer rongnung mezüngbuba Indian Administrative Service (IAS) jenjang tongtetla Asangla Imti IAS, Secretary to the Government of Nagaland, Power Department nem tenüngsang agütsüba sentong ka Khensa yimdak Multipurpose Community Hall nung meraketa kaogo. Iba sentong ya Khensa Village Council-i ayongzü.

Iba sentong nung Khensa Village Council, Khensa Senso Mungdang, Khensa Arogo, Village Development Advisory Board, Khensatsür Senden, Khensa Shisashir Telungjem, Khensa Senso Service Union item teloktemi Asangla Imti IAS nem tetushi o balala den senpet balala agi senpettsüogo.

Arishi küm 56 tain Asangla Imti (IAS) ya NCS 1994 batch lir. La ya asür Imtiyapang aser asür Mapushila na jala pezübuba lir. La ya Aonokpu nung Wb. Rongsen Jamir (DIG, Wireless) ki-i ao aser par kibong nem jala ana aser jabaso ka moaja lir. 2023 küm IAS jenjang angu aser La ya Khensa yimer rongnung mezüngbuba NCS aser IAS lir.

Lai iba sentong nung jembidang, Tsüngremi la ya tashi aniba asoshi Pa nem tenüngsang agütsüba den iba jenjang tongtetba ya yimertemi tamang tulu nung lumia sarasademtsüba ajanga lir aser yimeri iba ama tenüngsang agütsüba sentong tajung

ayongzüka asoshia pelaba metetdaksü.

Yimertem luyim balala nung takok balala angudang iba ama tenüngsang agütsütsüla, kechiyong tenüngsang agütsüba ajanga temeim adokdaksür aser yim den tesentaktep sangzü akangshidaksür, ta lai ashi.

Tanü lar tsürabur meliaka tsüraburi ochishia aser temerük nung alitsü sayuba den parnoki junga anitetba asoshi lar tsürabur atema kuli tajung agütsü. Laisa kinunger adianutem aser yimer teyariteper ajak dang pelaba lemsatep.

India nüchiso ngur küm 77 jungogo aser tanü India lima ya kechisarena ajak nung kanga renlokogo aser tetoktepbaji tesüngmangtsüka lir. UN-i alima rangben renloktsü asoshi nükla 2030 ta sür Sustainable Development Goals (SDG 17) ta sür mapatong 17 achayanga inyakdar, yangji India-a tongti shilem agir ka lir. Ibaji alima melenshiba nung asemtepbata sen asütsü, idakji ngujem aliba teinyaktsü maparen aika sentaka lir aser iba nungji ashimetet/sempet (skill)-ji kanga tongtibang asütsü, ta lai ashi.

Tanü joko degree kisüngi makoktsü, zünger odang kazütsüba masü, tanü alimai inyaktetsüba ashimetet (practical skill)-ji nungdaker, anungji, iba asemtepbata nung shilem agitettsüsa nai bilemba nung masü saka alima den jangyu medema aotsü asoshi

ngujem ulushitsüla aser mulungsentsü melenshitsüla, ta laisa lanurtem ayongzü.

Külemi tamang ka nung sarasademba nung tashi aser sayatenya lir, laisa Laishiba nungi Esther kaket 4:16, Yihusua kaket 6: 1-5 aser I Kor 2:9 item tokong nungi tatishtsü bener arua tamang nung aliba yim ka asütsü laisa ayongzükem.

La lanuwa class 5 tashi Model English School nung azüng, iba sülenji Class 10 tashi Ongpangkong School nung azüng. Iba sülen P.U Science zünger Agri küm 4 azüng. Agri dept nung mapa inyaka lia NPSC tatidang nung NCS menden ajangzüktet. Lar mapang tanü ama tazüngtsü kaket aser coaching class amala bulua maliasü, timtema züngtet aser shisajen (library) nung dang mapang teimba intok. La tebu yakta asü aser tetsü amshitsür kati lar kibong rangben anitet. Tepushiteper aser telemteba tulu yur azüngba ajanga tanü lai iba jenjang ya ajangzükteta liasü, ta temenungratsüka lai la lanuwa otsü kar lemsatep.

Khensa village council chairman, I. Alemmeren Longchar, Khensa Baptist Arogo Pastor, Mayanger Walling, Rev. K. Temjen Longchar, Rev. P. Longri, Khensa Senso Missionary Rev. C. Teyong Kichu, Maongchila Jamir (Khensa Senso Service Union) parnokia sentong nung shilem balala agia liasü.



Longsa aser Mongsenyimti Longkumer Meyisapong semchir Meyur, Rongchii 26, 2024 anogo Longsa yimtiba nung Aksü nguyu sentong kanga lungsoa agiogo. Iba ya tsürabur mapang nungi yim ana adianu mepila Aksütepa akangtepa aruba tang lanu putu asensortem danga tsürabur jakzüka ayuba tarensen tejangja angatetdaksütsü aser tarutsü anogotem nunga adianu mepila amalitepa alitsü akangjungshiteptsü sayubentsü shisa taroktem lemsatapa ajungshitep. Iba sentong nung yim ana prongla nungi anükapang aser temba tinutem lungsoa arua liasü.

OFFICE OF THE
NOKPU VILLAGE COUNCIL
P.O. Mangkolemba, B.P.O. Longchem
Dist. : Mokokchung, Nagaland

Ref.No..... **TEPELABA O** Date: 22/04/24

Nokpu Medemsanger putu menden nungi Mr. Bendangnükshi Pongen S/o Mr. Teka Pongener, Nokpu yimtiba nungi Pa Ao Senden ketdangpurtem rongnung Assistant General Secretary (2024- 2026) inyaksü shimtet nung ozü yimten aser sensopur ajak pelaba lemsateper aser Ao senden dang pelaba metetdaksür.

Nokpu Medemsanger putu menden ajanga pa mapa tang aser tarutsü nung takokba manung odakjang ta shisemer. Aser tematiba Tsüngremi pa taküm aser mapa ano maneni moajangma.

[Signature]
Secretary
Nokpu Village Council
Dist. Mokokchung
(LIMASUNEP)

[Signature]
Chairman
Nokpu Village Council
Dist. Mokokchung
(I SASHIMEREN AO)

Secretary
Nokpu Medemsanger Putu Menden

Chairman
Nokpu Medemsanger Putu Menden

Ao oshi mesamadaksütsü arok khuret lir



Dimapur, Rongchii 28 (TYO): Medziphema Town Ao Baptist Church (MTABC) Youth Ministry aser Ao Kaketshir Telungjem Medziphema lungjemer "Tetsü Oshi Terenlok" sentong ka tanü MTABC tenla kidang kaa liasü. Iba sentong nung tongti shisalen sayur Wb. P. Alem Jamir liasü.

Ao subject ya university tashi nung züngdakjaka, Aor yimkongi ozüng tesashi yanglur Ao oshi ya angazükdakjaka, Ao oshi renloktsü atema sentong jenti yanglua agiaka, Aortemi pei oshi indang aroka mebilemi züzüa dang toktsüra kodanga tangar memeneptsü ta iba sentong nung jembidang Wb. P. Alem Jamiri ashi. Tanü putu nung tongtibangsa lanurtem mekümdangi lira memenui asen oshijia tangar oshi ama tesamar rongnung adentsü, anungji Aor ajak saksalema alitsüla ta paisa lanurtem ayongzü.

Asenoki teti jembiba ama, Aortem Jungliyimti nungi arudang Aor inti meyong asutsü ta sür bener aruba osetbo kecha malitsü südi, saka Aor ajak senmang ka dang lir, ibaji Ao oshi ya asütsü. Anungji ibaji mera keta wazüka ayutsü asoshi Ao kin sanger ajak arok khuret asutsüla ta shisalen sayurisa ayongzü.

Tongtibangsa tanü asüng Ao Riju lenisüba nung Ao oshi renloktsü asoshi aika zülumen nung mangmangtepbata makai bentetbenteta aotsü asoshi

inyakyim tejangja lateta lir, iba den zülumen aika tajungba nung yanglushia lir, anungji nübur ajaki ibaji bushia amshitsüla ta Alem Jamirisa metetdaksü.

Tanü sentong nung jembia aodang, tongtibangsa tanü lanurtemi pei tetsü oshi ya mesenmetua amshiba angur, tarutsü nung iba tangatetbaji memelenshii ora kanga sasatsü. Anungji tang ya asentenshir tarokba nung bushitsüla, aji mesüra küm 40-60 tsüngda Ao oshi ya samatsü. Iba tiaji majurutsü atema ajaki asentenshir oshi ya meimtsüla, bushitsüla aser wazüka ayutsü asoshi inyaksüla ta sentong nung adener lanur ajak telungjem nung lemteta liasü.

Tetsü oshi terenlok omen nung ajemdaker tanü anogo piyong shisa lemsatepbata sülen, MTABC Youth Ministry aser Medziphema kaketshir lungjemer resolution luden ajanga lanurtemi inyaka aotsü yamai lemteta liasü. I) Arogo Youth Ministry aser Ao Kaketshir Telungjem Medziphema sentong ajak tetsü oshi agi yanglutsü. Ii) Lokti/kibongtem nung Tetsü Oshi agi dang jembitsü. Iii) Arogo nung 2024 küm tsüngda amungnü ka tekülem AKTM ajanga sentong achaayanga Tetsü Oshi Terenlok nung ajemdaker agitsü.

Tanü iba sentong nung Wb. Ojenchuba Jamir, APY, Sb. Tiayanger Imsong, Tir, AKTM aser AKTM kimen ajanga shilem tajung agia sentong mera leta abensadakja liasü.

Shiba PM südir süaka India rongsenkettzüng jenjang 3buba akümtsü: Chidambaram

Kolkata, Rongchii/April 28 (Agencies): Congress lenir tain, P Chidambaram-i, Ato kilonser Narendra Modi ya o kanga saloka jembir ka lir, kechiyong metetsümonga ataloktsü aliba kata pai tenangzükba kümdaktsür, ta ashi.

P Chidambaram-i, shiba Ato kilonser kümdir kümaka India ya alima nung rongsenkettzüng tulutiba linüktem rongnung jenjang 3buba akümtsü, ta ashi.

Interview ka nung jembidang taoba mapang Union finance minister Chidambaram-isa, India nung nüsüng teimba lir, anungji alima nung rongsenkettzüng jenjang tasembuba linükji India akümtsü, iba nungji tesüngmangtsü kecha mali, ta ashi.

World Economy Rankings 2024 nung India nung GDP ji dollar sen trillion 4.8 lir aser India dang nungi rongsenkettzüng tuluba aliba linüktemji United States, China aser Japan dang lir aser Germany den kanga atongtepa lir.

Alima nung rongsenkettzüng

tulutiba linük 10 rongnung France, Italy, Brazil, Canada aser UK-a densema lir aser item linükji India sülen ang lir.

"Narendra Modi ya o saloka jembiba nung tetangshi. Metetsümonga ataloktsü aliba ongo agi pai tenangzükba ka kümdaktsür. India ya alima nung rongsenkettzüng tulutiba linüktem rongnung jenjang 3buba akümtsü (GDP sasep nung)," ta pai metetdaksü.

Paisa, "2004 küm India nung GDP ji jenjang 12buba nung liasü. 2014 küm jenjang 7buba aküm. 2024 küm jenjang 5buba kümogo. Ato kilonser shiba südir süaka India nung GDP ji alima nung jenjang tasembuba akümtsü. Iba nungji tesüngmangtsü kecha mali. Asen nüsüng uluba sasep nung ibaji atangji ataloktsü," ta ashi.

Tamalen Union finance minister pezüben tashi inyaksang Chidambaram-isa, linük indang GDP ji ajanga linük nung nüburttem azükaru jenjang masadanger, saka per capita income ajanga tejangjaba asadantetsü, ta ashi.

"Kü tangatetba nungbo, azükaru jenjang asadantetsü

atema GDP masü saka per capita income amshitsüla. Ajisüaka iba lenla nungji India nung jenjang kanga ajema lir," ta pai ashi.

International Monetary Fund indang 2024 estimates nung India nung USD 2,731 per capita GDP ji alima nung jenjang 136buba nung lir.

Election nüboyim sentongtem nung Ato kilonser Modi-i pai inyaktetba tulutibatem rongnung rongsenkettzüng ainba lir, ta jembir aser pai nüburttem dang pai India ya alima nung rongsenkettzüng jenjang tulutibatem rongnung jenjang 3buba kümdaktsüsü, ta nangzükter.

Congress-i party manifesto nungi Citizenship (Amendment) Act agienadok asü?, ta asüngdangba langzüdang Chidambaram-i, Congress-i CAA anemer saka iba onük nung Supreme Court obendang atar, ta metetdaksü.

Arrla 370 agienba dak sendakba nung pai, Centre nung sorkar kümra party-i Jammu & Kashmir nem state jenjang agütsüsü, ta metetdaksü.

Sandeshkhali nung apuba hadirtemji CBI-i yutsüba lir: Mamata Banerjee

Kolkata, April 28 (Agencies): Sandeshkhali nung CBI-i TMC lenir, Shajahan Sheikh den inyaksemer ka kidang nungi prangpong aser injang aika apu ta sangdongbaji tiyazü, ta shia West Bengal Chief Minister, Mamata Banerjee-i, Sandeshkhali nung raraba hadir apuba indang kuli kecha mali, ta metetdaksü.

Trinamool Congress tongti lenirisa, CBI ketdangsertem jagi state police nem osang memetetdaksüi mita ao, ta ashi.

CBI-i raraba hadirtem apu, ta asüba nungji melung melemteteti chief minister-i, apuba hadirtemji CBI ketdangsertemji bener aruba asütsüa akok, ta ashi.

TMC nungi Asansol Lok Sabha candidate, Shatrughan Sinha atema nüboyimtsüba

sentong ka nung jembidang Mamata Banerjee-i, "Bengal nung firecracker ka apok nunga NIA, CBI aser NSG-i bushisüngdangtsü atema arur. Rara ka raradar ama sayur. State police nem osang magütsü. Kechisa anguar memetet. Kuli maliasü. Apuba hadirtemji parnoki (CBI) gari ka nung bener aru asütsüa akok," ta ashi.

Laisa, "Sandeshkhali anasa tatalokba ka liasü ta tanü ni angashiogo. BJP lenir kati par kidang bomb rizünga liasü. Parnoki (school) mapatem thinsür bomb ajanga takok angutsü ta bilemer. Onoki parnoki jembiba onüktem masü saka nüburttem atema amtsük, süoshi, ki aser mapa aginer," ta ashi.

Hokolbarnü CBI-i TMC

nungi anenja aliba lenir Shajahan Sheikh den külemi inyaksemer ka indang kiojen ana mita aoba mapang nung police service pistol ka aser foreign-made prangpong densema prangpong aser injang aika angü, ta ketdangsertem metetdaksü.

Taküm January ita nung Sandeshkhali nung Sheikh-i ajungmesoa lokti kati Enforcement Directorate (ED) ketdangsertem amak, ta tai tonglokja bushisüngdag tenzükba sülen February 29 nü West Bengal police-i Sheikh pua liasü.

Hokolbarnü North 24 Parganas district kübok Sandeshkhali nung Central Bureau Investigation (CBI), bomb detection squad, National Security Guard (NSG), central paramilitary forces aser West Bengal Police-i mita oa liasü.



April 28, 2024 nü Kendrapara, Odisha nung Lok Sabha election atema nüboyim sentong ka nung Congress lenir, Rahul Gandhi adenba noksa nung angur.

OFFICE OF THE LANGPANGKONG KAKETSHIR MUNG DANG
Langpangkong Students' Conference
H.Q. Chuchuyimlang - 798614, Dist. Mokokchung : Nagaland
Email : Langpangkongkaketshirmungdang@gmail.com

TENÜNGSANG AGÜTSÜR

Langpangkong Kaketshir Mungdang (LKM) Mendenti ajanga Langpangkong nung Wb. Marsanen Imsong (Merangkong), tesüba (Former) Langpangkong Kaketshir Mungdang (LKM) aser Langpangkong Tzükong Mungdang (LTM) Tir, Lt. Wb.N. Yaongnok Imsong aser Lt. Wt. Tongpangkoka-er jabaso Ao senden Tir asütsü asoshi temolung lemteta maongka tulu agütsü nung LKM Mendenti ajanga Ao Sünak abener ajak dang kanga pelar aser Lenir nem tenüngsang tulu agütsür.

Tsüngremi nü taküm aser wadang maneni asen Aor-tem asoshi moajangma ta LKM sarasadem.

Sd/- IMLINOK
President, LKM

Sd/- MEYITONGPANG
General Secretary, LKM

THE LIVINGSTONE FOUNDATION INTERNATIONAL
THAHEKHU / KEVIDAU, DIMAPUR - 797112, NAGALAND

2024 ADMISSION OPEN NOW FOR GRADE - XI

ENROL NOW

- ARTS (HUMANITIES)
- COMMERCE
- SCIENCE

UNIQUE FEATURES OF LFI

- INTRODUCING FIRST TIME IN NAGALAND Adventure & Jungle Survival Tactics and Combat Skills by URBAN JUNGLE.
- Marital Art - Nagaland Pensak Silat
- Music classes - CLEF NOTE Music Academy
- Football Coaching - Dimapur Football Club
- Fitness Classes - PAWF Nagaland
- Fine Arts & Calligraphy - Wandering Minds
- Horse Riding
- Philately & Numismatics Club • Literary Club
- Legal Literacy Club • Gardening • Eco Club
- Youva Tourism Club • Career Counseling & Guidance
- Educational & Exposure Tours • Workshops on various topics
- Mental Health & Wellness • Scholarships
- Olympiads • Science Club • Michael Energy Club
- Lagori International Traditional Game • Photography Club
- DIY Club • Life Skills • IAYP • Model United Nations
- Swachh Bharat & Cleanliness Drives
- Students Exchange Programmes • Community Services
- Leadership & Soft Skills Trainings • NCC • Scouts & Guides
- Indoor & Outdoor Games

WHY CBSE??

- CBSE has its presence in 27000 schools in National and 240 schools in 28 foreign countries.
- CBSE is considered as one of the best boards in cracking Competitive Exams like UPSC, NEET, JEE, AIEEE, PMT, CDS, etc. as most of the questions are CBSE syllabus based.
- In comparison with many other boards of India, more than 60% of students who get into the IITs have CBSE background.

WE GROOM CHILDREN FOR LIFE !

- Forms available between 9:00am and 2:00pm at the LFI Accounts Section.
- 100% Concession for Grade-XI in both Hostel & School Fees will be granted to Meritorious Students from recognized Boards.
- 25% Concession for Grade-XI in both Hostel & School Fees will also be granted to students with excellent flair in Sports, Art, Music & other such skills.

JOIN US ON SOCIAL MEDIA

livingstone.nagaland@gmail.com
livingstonenagaland.com
livingstonenagaland

CONNECT WITH US 03862-244203 491700596092 / 93

Arvinder Singh-i Delhi Congress Tir menden toktsü



Arvinder Singh Lovely

lemsatepogo," ta metetdaksü. "Ticket alemba dak sendakba nung melung mesüi ni iba ya inyaker, ta olulu jembirtem dang ni ya ashir- anogo asem jakdang osangbenertem senden ka nung ni candidate tem metetdaksü," ta pai metetdaksü.

New Delhi, April 28 (Agencies): Amongnü Delhi Congress Tir, Arvinder Singh Lovely-i Tir menden nungi anenba shidi Congress National Tir, Mallikarjun Kharge nem agütsüogo.

Lovely-i, pai Congress toktsür masü saka Arvind Kejriwal'er Aam Aadmi Party den loktepbaba anema Congress Tir menden toktsür dang, ta metetdaksü.

Osangbenertem senden ka nung pai, "Iba tejashi ya kü meyong kija masü saka Congress lenirtem ajak meyong. Ni shidi ajanga Mallikarjun Kharge den-a

Lovely-i shidi ajanga, "Delhi Congress Unit-i Party ka den meloktepnüi liasü, kechiyong iba party ji Congress party nem ochimashi tai tonglokja tentetba party lir. Ajisüaka party-i Delhi nung AAP den lokteptsü atema telemtetba agi," ta metetdaksü.

Yaküm August ita nungi Lovely-i Delhi Congress Tir inyaka liasü.

Ajisüaka pai party telemtetbaji akümtsübua liasü aser Delhi Congress unit-ia bangdak tetuyuba sülen anidaka liasü, ta pai ashi.

"Ni Kejriwal (Delhi Chief Minister Arvind Kejriwal) apuba aonunga par ki sendanga liasü," ta paisa metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, APRIL (RONGCHII) 29, 2024

Kechiba azüngtsü ?

Taküm küm asoshi Nagaland Board School Education-i agiba class 10 aser 12 tatidang agütsürtem takok aser tamakok osang metetdaksüba sülen tang ya takok angurtem pei pei jangraba azüngtsü atema kaketreju tasen bushia merangtepba mapang ka lir. Iba küm class ter nung takok angurtem ajak agi 15,588 lir aser class 12 nung takok angurtem ajak agi kaketshir 14,682 lir. Class 12 nung takok angurtemjibo ajak kasa masü saka pei azüngba shisaliok kongsang balala lir, anungji item rongnung Arts azünger 11,781, Commerce azünger 832 aser Science azünger 2069 liasü. Item ajakji class 10 aser 12 tashiji zünger anentsüba masü saka taküm nung mapa ka kümteta inyaka aotsü atema shisalen bushia angazüksüba shitakba mapangjibo tangang tetenzüker asütsü. Aji oda, class ter nung takok angur süshia, class 12 ajantetertem süshia, parnok ajak asoshi ibai taküm nung telemtetba agitsü lenjem tongtibang ka lir, anungji kechi azüngtsü ta asüba nükjidong nung telemtetba agitsüba kanga tongtibang akümer. Iba ama mapang nung kibong aika nung tsüraburtem o tanurtem na tebilemba balala asütsü akok, anungji tang aser tarutsü indang bilema tanurtem o tsüraburtem na tsüngda tebilemba aser tangatetba lemsateptsü kanga nungdaker. Atangji, tazüngtsüji tanur mapa asünungji, tanuri memelungba aser mejangraba mapa ka inyaksü asoshi tsüraburi kangshia züngdaksütsüba nungdak madoker idakji takoksa, tamakok aser lendong lir. Ajisüaka, ano külen tanurtem aikati tang kechi azüng nung tarutsü nung kechi akümtsü ta asüba taküm aser tensa tia indang junga mangatet aser mejangjateti alitsü, anungji tsüraburtemi tesayurtem teyari agi tanurtem angatetdaksütsüba nungdaksü. Iba ama lemtet lenjem nung nokdaka yur taküm lenmang shimtet dang tangar azüngba nükshia masü mesüra tular aser takar akümtsü nükla nunga masü saka taküm nung kechi inyaksü jangrar ta asüba tang tongtibangtiba asütsü. Aji oda, kodang nisung kati pei jangraba mapa angazüksü merangdir kanga melaa angazüktettsü aser pei jangraba mapa inyakba nungbo takok aser temoatsüa angutsü. Item tajungtem dakji alaka alima nung nisung ka asoshi tepela angudak tesem tulutibaji taküm nung pei jangraba mapa inyakbaji asütsü. Aji oda, pei jangraba mapa inyaker asünungji mapajia kanga junga inyaktettsü aser kanga junga inyaktetba mapa nungji tajangzük aser temoatsü dena lir. Itemji temulung nung yur class 10 aser 12 nung takok angurtem asoshi shisaliok bushiloka aotsü atema telemtetba agidang asenoki mamatsüba tongtibang nükjidong kaji kechiba azüngtsü (?) ta asüba tasüngdangba langzüsüba mapa ya asütsü, kechiyong kechi azüngtsü (?) ta asüba dang nungibo, ano, kechiba azüngtsü (?) ta asüba tasüngdangba langzüsüba tang tongtibangba akümer. Azüngtsüba jibo, atangji, pei jangraba agi azünger asütsü akok mesüra tsüraburi ajungshi marem azünger asütsü akok, saka zünger külen kechi asütsü ta asüba angateter apusotsüba kanga tongtibang lir. Asenok aikati zünger mapa meinyaki ayongayonga ita sen chia alitsü bilema azüngtsü akok mesüra zünger sen sen dang bushia takar akümtsü tangatetba yur azüngtsü akok. Ajisüaka, shiba südir süang shisaliok bushiloka azüngbaji mapa inyak angazüker asütsü, anungji azüngba nükjidongji kong kechi inyakdir inyakang alima nung nübortem nungdak ataloktsütsü asoshi azünger asütsü. Tongmelang agi angatettsüba kaji, azüngbaji mapa inyaksü azünger. Atangji, tanübo zünger nisung aika mapai mao ser ita sen agir aser ano nisung aikati mapa meinyak ser sen agizüka agir. Ibaji tazüngba nükjidong masü aser masütsüla. Tazüngba nükjidongji nisungtemi ajuruba timtem aser tebilemstütem kokteta anisüngzük agütsütsü asoshi lir. Aji oda, tazüngbaji timtemer asoshi teyari bushii aoba amai lir, anungji meyipa arur timtemertemji yaritsüla. Ibaji kodang angatetdir, shisaliok bushiloka azüngtsüba Tsüngremi tenyaba mapa ataloktsütsü asoshi azünger amai angateta azüngtsü.

OLEMSABANG

Secular dang masü Theologian-a mapa mataba tebilemstü agi tonggogo

~ L. Kika Pongener

(Yashi adok nungi...)


Kodang arogo tulutem nung aliba Fellowship shiaji arogo ka-ka küma razüka yokdir, item arogo shia nungji Senior Pastor ka den, Associate Pastors, Directors, Home Evangelists, Counsellors, Missionaries, Secretaries, Accountants, Clerks, Cashiers etc. aika mapa angutsü. Ano arogo shia jagi Missionary tang dang nungi tali aika yoktettsü aser Mission mapa-a, tang dang nungi wadang tuluba inyaktettsü. Ano arogo shia jagi Schools, Colleges, Hostels etc. kar lapoktetra, item Institutions nungji laishir aika Principals, Administrators, Professors, Lectures, Teachers, Wardens etc. mapa angutsü. Aji oda, kodang arogo ka nung züngsem noklang/merijang aika sudir, toklanga tenzük, Pastor, Associate Pastor, Home Evangelist-tem-a kipoki tsüngdong aotsübaji mapa tasak asütsü, kechiyong kibong ajak ayimjema sema aotsüji kanga temelabo masü. Ttanü jila arogo tulu aika nung arogopurtem nungi temulong masüba aser nungsen jembia angazükba...Arogo nung toklang tenzükertemi, talisa Pastor/Associate Pastor-temi kibongtem semdangba agi tanüngkongba indang nungsen jembiba aika-sa angazüker. Tanüngji kodang Fellowship ajakji arogo ka-ka küma razüka yokdir, Pastor-tem, Associate Pastor-tem aser toklang tenzük atema arogopur kibongtemji mela-mela ayimjema kipok shiai tsüngdong aotsüba tang dang nungi kanga agi temelaba asütsü. Atangji, arogo telongzük (Area) tulu sur, arogopur züngsem merijang junga sur, item kibongtem ajungaji kipok tonga yia Tsüngrem o agi mesütsüba...Pastor-tem, Associate Pastor-tem, Home Evangelist-tem, Evangelistic Committee aser tenzükertem atema-a mapa kanga temelabo masü.

Ttanü arogo tulutem ajunga tamakok anguba küli tulutiba kaji, arogopur ajunga ayimjema Tanela chiyungtsü agi memesutetba/meperidaksüba, kipok shiai tsüngdong yia mesemdangtetba ibaji asütsü. Iba tamakokji arogopur tsüngdang tang masü, saka Tsüngrem tsüngdang sentsüh tulu asütsü. Tanüngji akokba tashi, arogoji nutsüng ishiba/tilaba küma yanglur, arogopur kibongtem ajaki tsüngdong yia ayimjema Tanela nungdak peridaksütsüba ajak dang togtipangba (Priority) sudaksütsüla. Ano kodang arogo nung nutsüng aika sudir, arogo nung sentong balala agidanga arogopur ajakbo shilem agi matadaksütettsü, aser arogo sentong nung karbo shilem agi khen danga matadaksüi senzüka toktsüra, tejak-tebang reprangba aser tanak-temesung bendanga beshiba (Partiality) ama arogopur karibo bilemstü. Tanüngji jila tulutem nung aliba arogo ajaki, tim ama bilemra...Fellowship ajak yagi Independent arogo ka-ka küma razüka yoknungbo kanga ajungtsü. Aji oda, yamaji lim arogo ajungai inyaktetra, Itanürtem Theology zünger mapa manguba tebilemstü ya terabo pongpa-a akümtsü sudi ta bilemer aser arogopurtema Tanela chiyungtsü peria agütsütettsü. Ttanü asen Ao lima lim arogo aika nung arogopurtem taginuba ola adokbaji aser nungsen jembiba angazükba...Arogo nung Pastor/Associate Pastortemi kipoksem aoba agi tanüngkongba, arogopur karbo küm songtema nunga khen danga majurudangba, yamala tamakok aika lir.

Tanüngji arogo tulu, tzusenba züngsem aika aliba, sen crore aika akaba, arogo property/infrastructures aika akaba, iba tangatetba nungji rangloker masü...Saka kipok ajaki tsüngdong yia, arogopur ka danga atsüngzüka meyoki, mesamadaksüi ajak awajema, anir arutsüba aser Tanela chiyungtsü/Tsüngrem o agi peria mesütsüba nung rangloker tenzüktsüba/inyaktsüba tongtipangba (Priority) sudaksütsüla. Tanüngji arogo nung tangatetertem, tashitemetertem aser yimtsü-yimbotemi shisatsü tesadem (Wider scope) agi Fellowship ajak ya Independent arogo ka-ka küma razüka yoktsü tangatetba alitsüla. Tsüngrem oi ashir..."Nenok tezülur aser Farise anemsutem aiatai ! Kechiaser nenoki kodak yimli nungi nisung shidanga adoker. Kechiyong nenoki nenok sasaka mair aser tangar taitü alibaa meidaktsür (Mathi-23:13). Ezekiel ainkar-ia yamai shin..."Yamai Kibuba Tsüngremi ashir, Pei dang mesüba Israel Sannukertem asoshi aiatai ! Sannuker-temi santem memesutsü no ? Nenoki temo achir, nenoki tezüng su abener, tejekketba nenoki tepseter, saka nenoki santem memesur. Nenoki tashi maitbatem tashi meitdaksü, mesura shiranger manepsü, mesura zübobang maleptsü, mesura mashileni aor meyipa anir maru, mesura tesamaba mebushi; Saka tashiyim aser tesashi agi nenoki parnok madak yimsu asü" (Ezekiel-34:2-4). Tanüngji Tsüngrem lartem aser arogo nung yimtsü-yimbo, tashitemetertem, tangatetertem...Tsüngrem tsüngdang sentsüh masütsüba kanga shisa kaa tenzüktsü aser inyaksü ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Küm 72 tashi pastor inyaksang Rev. Dr. Nathaniel Benford süogo



Rev. Dr. Doris Nathaniel Benford

April 27, 2024: Texas nung aliba Arogo ka nung pastor küm 72 tashi inyakba ajanga mapang talangtiba tenzükba Guinness World Record angur pastor ka süogo; pa arrshi küm 94 liasü.

Rev. Dr. Doris Nathaniel Benford ya Texas yimti nung aliba Rising Star Missionary Baptist Church nung küm aika pastor inyaka liasü.

Arogoi Facebook post ka ajanga, "Onoki meima aliba pastor, obala aser oboula Kibuba kidangi ogo. Rev. D. N. Benford, Sr. Kibuba den alitsü atema ogo. Pai Kibuba atema mapang talangka raraogo aser Pa den alitsü atema pa jar ogo," ta metetdaksü.

Pa alima nung mapang talangtiba pastor inyakba atema 2022 küm October ita nung

Guinness Book of World Records-i pa nem award agüja liasü. Rising Star Missionary Baptist Church nung Benford-i küm 72 ser anogo 61 pastor inyaka liasü.

1950 küm pa arrshi küm 20 aliba mapang nungi tenzükba pai Rising Star Missionary Baptist

Church nung sayutsüngi aser küm 70 dak tema kasa sabang nungi sayutsüngi.

Benford arrshi küm 14 asüidang pai mezüng sayutsüngi tenzükba liasü.

"1947 küm Rev. D.N. Benford-i Texas City nung par medemer Rev. FM Johnson ajurui oa liasü. Rev. Johnson-i Rising Star Missionary Baptist Church nung sayutsüngitsü liasü saka pa shirangadokba agi pai Rev. Benford dang pa melen sayutsüngitsü asüngdang," ta Guinness Record indang website nung shia lir.

"Rev. Benford-i sayutsüngiba ajanga Rising Star Missionary Baptist Church kanga melung süa liasü aser Arogoi Rev. Benford dang, tarutsü nung parnoki pastor nüngdakra parnoki pa den tongteprateptsü ta ashi, kechiyong pai sayutsüngibaji ajanga parnok kanga melung süa liasü. Küm asem shi lir 1950 küm Rising Star Missionary Baptist Church-i pastor ka bushi tenzük," ta kasa website nung shia lir.

"Parnoki Rev. Benford Sr. bushiba ama angu aser pa dang Rising Star Missionary Baptist Church-i arua sayutsüngitsü asüngdang. Ajioda 1950 küm June ita tasembuba Amongnü pai sayutsüngia liasü. 1950 küm August 27 nü parnoki Rev. Benford den tongtepratep aser iba mapang nungji Arogo züngsemtemi Rising Star Missionary Baptist Church nung pa pastor shima liasü."

Taküm Easter Sunday anogo nung Rev. Benford-i iba Arogo nung sayutsüngi aser ibaji pai sayutsüngiba tatembangbuba liasü.

Par jala, Mokysa Benford-i, "Iba ya mamangtetsüka lir. Pai pa taküm kanga tepor junga liogo," ta ashi.

Rev. Benford-i par Arogo züngsemtem atema mapa tajung jenti inyakba dang masü saka nüburttem atema-a alia oa inyak aser Arogo nung lanurtem atema-a nendaka inyak.

Par jala, Yolanda Proctor-i, "Mapang shia pai gari nung megaphones inoka bener nüburttem dang vote agüjang, ta ajungshia senzü," ta ashi.

Pai sensakertem yari, chiyungtsü aser süoshi agütsüba den külemi sensaker kibongtem atema-a sentong balala ayongzüka katsüogo.

Mapang shia Benford-i Arogo bus nung sensaker kibongtem tesem balalai anir oa liasü.

Rising Star Missionary Baptist Church-i, Rev. Benford nem akhüm agüja Tenla ki sabang nung aliba pa mendenji anogo 30 tashi meyibanga ayutsü, ta metetdaksü.

ANOGO ABEN TSÜNGREM DEN

Tebilemetsü Mapa Agiba

Idangji nisung jagi ashi, koba tetsür nai kü den alitsü agütsü, lai iba süngtong nungi kü nem agütsü aser ni achi. Lipok 3:12.

Adam aser Eva nati parnoki temenen inyakba paidoktsü meranga mapa ajak inyak. Adami tebuttsü aitsü: "Lai kü nem iba süngtong nungi kü nem agütsü." Pai Tsüngrem dang temeyong agi tuita, "Nai iba tetsür kü nem agütsü" ta ashi. Evai per nem tai agütsü. "Peri ni ashioktsü, aser ni achi." Tsüngremi parnoki kuli yanglubatem mezüngshia aser parnok tashi mangaba nungi kechi adoktsü iba obendang ka agütsü.

Meimchir tejashitsü kaji parnoki parnok mapa nung tebilemetsüji magizüker. Asenok tebilemetsü asenoki tangar dang dak tongloktsür. Asenok tanishiri junga merepranger, tsüraburi junga mesayu, tembartemi raksatsü, onok pastori junga sayutsüngi masür, tanurtemi tashi mangar, kinungbo- kinungtsü tsüngda junga tangatetep mali, mapa peria mangur kanga mazüng tatemzükba kuli aika yanglur! Aji saka asenoki asen mapa nung tebilemetsü khuretji magizük tashi tatok agütsüba aser meyipba agizükbaji malitsü.

Asenoki chichiba temulung meyipba mekatetbaji asenok temenen libaliro yimya asoshi tatemzükba kulitem yanglur. Laishiba nung kar menen asoshi Tsüngremi kar nem tongtsüba mangur. Ne O au süra au, nunga süra nunga ta asütsü Tsüngremi mulungba lir. Asenoki asen tamakok kar nem nünglokja ali tashi kodanga chichiba temulung meyipba dangi marütsü.

Tsüngremi asenok mapa züngdangtsü, tangar mapa masü (2 Korint 5:10). Asen menen metetta alitsü aser iba khuret abentsü teti merangang. Iba Tsüngrem nungi tatok angutsü na nüji kümdaktsütsü aser tanela nung tashi itta küma tejakleni awa aotsü.

Indonesia nung Muslim lenirtemi Pastor ka anema ken o benok



Pastor Gilbert Lumoindong

April 28, 2024: Indonesia linük nung Muslim nunger lenirtemi pastor kati Islam yimsü mezüngmeshiogo, ta tai tonglokja pastor anema ken o benokogo.

Indonesia Bethel Church (Gereja Bethel Indonesia, GBI) nung pastor, Gilbert Lumoindong-i video ka nung Islamic sarasadem aser sensakertem nem tenla agütsüba o Laishiba nung shi aliba ter-shilem tenla na medemdanga/atishitepa jembia

liasü. Iba dak sendakba nung Muslim nunger attorney, Farhat Abbas-i, pastor-i Islam yimsü mezüngmeshiogo ta tai tonglokja Arpil 16 nü Jakarta nung aliba Metro Jaya Police Headquarters nung ken o benok.

Jakarta nungi kilometer 1,842 shi pilar aliba Makasar, South Celebes nunga South Sulawesi Arimathea Forum nung tongti, Jumzar Rahman leniba kübok attorney anatia pastor Gilbert-i

Islam yimsü mezüngmeshiogo, ta tai tonglokja South Celebes Regional Police Headquarters nung ken o benokogo.

Rahman-i, "Iba video ajanga onok melung yirur. Onok Muslim nungertemi jashir. Onoki amangba Islamic ozüng kodaser pai asayamenüja jembir?" ta ashi.

Ano Metro Jaya Police Headquarters Jakarta nunga Capital Special Region (Daerah Khusus Ibukota, DKI) Youth Committee organization tentüng

nung Sapto Wibowo-i pastor Gilbert anema ken o ka benokogo.

Sapto-i, Pastor Gilbert-i jembiba o ya Information Technology and Electronic Bill (Undang-undang Informasi Teknologi and Elektronik, UU ITE nung Arrla 28 kübok tesempa o jembiba lir, ta metetdaksü.

Sapto-isa, Pastor Gilbert-i tatok meshiba kija jagi meperitsü; tarutsü nung item ama mebeshitsü atema pa nem temerenshi agütsütsüla, ta ashi.

Paisa, "Muslim nunger ka ama tatok agütsütsüji tim saka Gilbert Lumoindong nem temerenshi agütsü nung ang tarutsü nung yimsü dak sendakba onüktem nung o lemtepdang nüburttemi kanga kümdangtsü," ta ashi.

Amongnü sayutsüngidang Pastor Gilbert-i 'Islamic zakat' nung Muslim nungertemi pei income nungi shilem 2.5 charity atema agütsütsü shia aliba indang jembia liasü.

Pai Muslim nunger jashidaktsütsü tebilemba nung iba oa ya jembiba masü, ta shia pai tatok meshia liasü.

Muslim nungertemi pa anema ken o benokba sülen pai taoba mapang Indonesia tatong tir Jusuf Kalla aser Indonesian Mosque Council (Dewan Masjid Indonesia, DMI nung tongti ajurua tatok meshia liasü. April 16 nü Jakarta nung osangbenertem den jembidang pastor Gilbert-i, "Mangatetep adokba atema ni ajemalua tatok meshir," ta ashi.

Pastor-isa Indonesian Ulema Council (Majelis Ulama Indonesia, MUI) nung tongti ajurua tatok meshiba sülen MUI tongti, Cholil Nafis-ibo par teloki Pastor Gilbert nem tatok agütsüogo, ta metetdaksü.

Cholil-i, "Gilbert Lumoindong-i pai Islamic tesayuba mezüngmeshitsü nükjidong nung jembiba masü mesüra telemsa adokdaksütsü nükjidong nung jembiba masü, ta onok dang shiogo. Lenirtem ama onoki pa nem tatok agütsüogo," ta metetdaksü.

Tang alima nung Khristantem tamajungba reshikangshiba linük 50 rongnung Indonesia ya jenjang 42buba nung lir (Open Doors' 2024 World Watch List).

**AO OSHI ANGAZÜKDAK:
TANÜ ANGAZÜKTSÜBA OJANG**



Süngko

(n) taküm sangnu tapu balala (grasshopper)

* Süngkoi alu mejungi chitsür.

Süngkojong

(n) lah aser koya mesük tashikang atenba shiruru (flying squirrel)

* Süngkojong ya süranü nung longsoa angur.

OLONG PAITEP # 6771

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN	LANGTSÜNGLEN
2. Auonungchiyongsü asenba - (7)	1. Lenmang - (7)
5. Mangyimba mapang - (5)	2. Aor kidong ka tenüng - (6)
7. O tamendakdak - (4)	3. Tenarong maten - (6)
8. Peidak malangba - (7)	4. A____g - (3)
10. Juli - (7)	6. Mopung apodoka - (3)
12. Sen ayudak - (7)	9. Tongtipang tagitsü - (7)
14. Tenük agi ajitet - (4)	10. Menungra bilem - (6)
15. Tamajung aküm - (5)	11. Aiür - (6)
16. Apuso - (7)	13. S____k - (3)
	14. T____r - (3)

OLONG PAITEP # 6770 TELANGZÜBA

TIPIEN :	LANGTSÜNGLEN :
1. Yiar, 3. Tesola, 7. Yimra,	1. Yimti, 2. Amen, 4. Shiner,
8. Tangar, 9. Peria, 10. Tanur,	5. Alaka, 6. Satan, 9. Putet,
11. Tasen, 13. Lemjem,	10. Tembar, 11. Tatok,
15. Tambu, 16. Khuret,	12. Amang, 14. Jala.
17. Sang.	

**NAI-A YA METETTER MA
ROAD MILE WORLD RECORD**



Kenya nunger Emmanuel Wanyonyi-i April 27, 2024 nü 'road mile world record' ka yanglutetogo. Herzogenaaurach, Germany nung Road to Records sentong nung Wanyonyi-i minute 3 ser second 54.5 nung mile ka asemteta liasü. Arishi küm 19 tain Wanyonyi-i America nunger Hobbs Kessler-i yangluteta aliba otsü (3:56.13) ajatetogo. Wanyonyi ya 800 metres nung asemer ka lir aser Budapest nung 2023 World Athletics Championships nung pai silver nguteta liasü. Iba sülen pai 2023 Diamond League nung gold angu.

Meghalaya sorkari May 7 nü Harijan Colony atema lemtet ka agitsü

Shillong, April 28, 2024 (Agencies): Meghalaya sorkari May 7 nü Harijan Panchayat Committee (HPC) den senden ka amentsü aser idangji Harijan Colony nung alirtem tangalen i aotsüba ken o angatetteptsü ta Deputy Chief Minister Sniawbhalang Dhar-i ashi.

"Iba senden ya tatembangba asütsü aser iba anogo nung lemtet ka agitsü" ta Dhar-i ashi.

Sorkari HPC den Sweepers' Colony nung alirtem anientsü atema lemtet ka agitsü temulung agütsür ta Dhar-isa ashi. Pai Urban Affairs department ketdangsüa abener.

Harijan colony nungi kibong 342 tashi anientsüba ya tebilemtsü

khuret ka lir ta Meghalaya High Court-i July 2023 nung shia liasü. Iba ken o ya mapang talangka mangatettepi arur ta HC-isa ashi. Mezüngbo HPC-i kibongtem anientsü tebilemba magizüki liasü saka yaküm June ita parnoki sorkari ashiba mulunga agizük.

HPC-i blueprint jibo agizükogo saka relocation plan nung temelenshi kar asütsü shidang ta Advocate-General Amit Kumar-i yaküm June ita shia liasü.

Relocation plan nung municipal board indang ki nung ali acre 2.14 acres agütsütsü shia lir. Ano iba tesem jakdang ali 1.4 acres agütsütsü aser ajak meyokteper ali 3.6 acres agütsütsü.

Meghalaya nung Harijan Colony ken o ya mapang talangka jembia arur. Iba colony dang Them Lew Mawlong ta ajar aser küm aika atsütepa arur.

Iba colony nung nisung alitsüba, infrastructure aser sanitation nung timtem ajurua liasü aser iba jagi Meghalaya High Court-i kibongtem anientsüba atema lemtet tajung ka agitsü shiogo.

Meghalaya sorkari June 4, 2018 nungi iba ken o angatetteptsü meranga arur. Idangji taoba Deputy Chief Minister Prestone Tynsong lenisüba kübok high-level committee ka tenteta kuli kakettem ajak repranga liasü.

**OFFICE OF THE
AO STUDENTS' CONFERENCE (AKM)**
H.Q. Mokokchung - 798601 : Nagaland
Regd. No. Rs. 3072
" For the Nation "

Ref. No. AKM/EDU-SEC/PR-10/2024. Date.... 27/04/2024....
KONANG TETUSHI AGÜTSÜR
Ao Kaketshir Mungdang mendenti ajanga asen Aor Kaketshirtem NBSE ajanga agiba HSLC aser HSSLC Tatidang nung Kaketshirtem rongnung alakteta temaba jenjang nung takok angurtem nem tenüngsang aser aküm tulu agütsür.

HSLC

SL.No	Name	Rank	Percentage	School	Father's Name	Village Name
1	Moamenla B Kichu	9(a)	96.83%	Fernwood School, Kohima	Wb. Benjontoshi	Aliba
2	Benjungakum Jamir	9(c)	96.83%	Don Bosco School, Tuli	Wb. Meyidangit	Merangkong
3	Chendila Walling	10(a)	96.67%	Queen Mary Hr. Sec. School	Wb. Lanuchuba Walling	Khar
4	Suyaben Longkumer	10(c)	96.67%	Holy Cross Hr. Sec. School, Dimapur	Wb. Nungshipokba Longkumer	Ungma
5	Tajungren Imsong	12(b)	96.33%	Little Flower Hr. Sec. School, Kohima	Wb. Apong Imsong	Longjang
6	Moakum T. Longkumer	12(c)	96.33%	Edith Douglas Hr. Sec. School, Mokokchung	Wb. Tinuyangba	Dibuia
7	Aiensen Aier	13(a)	96.17%	Little Flower Hr. Sec. School, Kohima	Lt. Wb. Rejasangba Aier	Mopungchuket
8	Imibong Jamir	14(c)	96.00%	Coraggio School, Kohima	Wb. Longtinok Jamir	Sungratsu
9	Nukshirenla Kichu	14(d)	96.00%	Dainty Buds, Kohima	Wb. Nungsangtemsu Kichu	Khensa
10	Tiarenla Longkumer	14(e)	96.00%	St. John's School, Kohima	Wb. Moanungba Longkumer	Merangkong
11	Tiainla	14(g)	96.00%	St. Mary's Hr. Sec. School, Padampukhuri	Lt.Wb. Akumpong Longchar	Dibuia
12	Imkongsungit Jamir	17(a)	95.67%	Fernwood School, Kohima	Wb. I.Korachiba Jamir	Merangkong
13	Liropong Ao	17(c)	95.67%	Sacred Heart School, Mon Town	Wb. Temsutoba	Khar
14	Imkongsenla Longkumer	17(e)	95.67%	Little Star Hr. Sec. School, Kohima	Wb. Moatoshi Longkumer	Changtongya
15	Imjunglila Jamir	19(a)	95.33%	Model Hr. Sec. School, Kohima	Wb. Moakumzuk Jamir	Khar
16	Temsujungba	20(i)	95.17%	Lima Aier Hr. Sec. School, Dimapur	Wb. Imlitemjen Walling	Khar

HSSLC (ARTS)

SL.No	Name	Rank	Percentage	School	Father's name	Village Name
1	Akolendang	2	96.80%	Don Bosco Hr. Sec. School, Dimapur	Wb. Imtionen	Ungma
2	Marmungtet	4	95.80%	Queen Mary Hr. Sec. School, Mokokchung	Wb. Imoliba Ozukum	Mongsenyimti

HSSLC (COMMERCE)

SL.No	Name	Rank	Percentage	School	Father's Name	Village Name
1	Imemebo Ozukum	8	94.20%	Holy Cross Hr. Sec. School, Dimapur	Wb. Tulutoshi Ozukum	Mongsenyimti

HSSLC (SCIENCE)

SL.No	Name	Rank	Percentage	School	Father's Name	Village Name
1	Narola Imsong	1	96.20%	Queen Mary Hr. Sec. School	Wb. Wati Imsong	Yaongyimsen
2	Imtisungkum Longkumer	3	94.20%	Queen Mary Hr. Sec. School, Mokokchung	Wb. Martemshi Ao	Longsa
3	Lipoktoshi Jamir	6(b)	92.00%	St. John Hr. Sec. Residential School, Dimapur	Wb. M.Sadem Jamir	Chuchuyimpang
4	Temjenlemla Longkumer	7	91.60%	Little Star Hr. Sec. School, Dimapur	Wb. Moyajungshi Longkumer	Longsa

Ano Aor Kaketshir shirnoki Subject balala nung NBSE kübok state subject toppers aser Kaketshir shirnokisa 2024 HSLC aser HSSLC nung takok tajung nguogo, nenok ajak nem Ao Kaketshir Mungdang (AKM) Mendenti ajanga takok tepela aser tenüngsang agütsür.

Nenok mapa tajung meranga inyakba tejang tangtetogo ta Tsüngrem nem tenüngsang agütsür. Tsüngremi nenok kija takum shia kaket shisaliok angazükba wadang nung maneni moajang ta AKM sarasadem.

Lanutoshi Aier
President

 Lanulemba Longchar
Education Secretary

Russia aser Ukraine na energy sector nung tenük yoker makteper

Kyiv/Moscow, Rongchii/ April 28 (Agencies): Russia aser Ukraine na asendenshir energy infrastructure nung tenük yoker makteper aser item tesemtem raksatsü, ta linük anaprong nungi ketdangsür temi ashir.

Ukraine indang army-i anogoshi linük nung tensa majungba indang osang lemsatepba ama Honibarnü lemsatepdang, Russia-i missile amshia Ukraine nung amak ta ashi.

Tsükchiri ano Ukraine indang energy infrastructure nung makogo, ta Energy Minister German Galushchenko-i Facebook post ka nung ashi.

"Talisa Dnipropetrovsk, Ivano-Frankivsk, aser Lviv region tem nung aliba facilities amak. Yangji osetsüset raksaba lir," ta pai ashi.

Ammang agi sangwa kuma amakdang thermal power plants asem nung oset raksatsü, ta DTEK power operator ajanga ashi.

State electricity operator Ukrenergo-ia timtem majurutsü

asoshi jelia mera agiba ama anüolen main overhead power line disconnect süogo, ta ashi.

"Nüburtem dang electricity kanga kumdanga agitsü ajungshir. Industry dang electricity imports ulushitsü aser power sources danga amshitsü ajungshir," ta Ukrenergo-i ashi.

Tang tesüsa Russia-i amakba nung drones 34 amshi aser 21 khazüka yok, ta Ukraine-i ashi.

Ita ishika Moscow-i Ukraine indang energy facilities nung tali tenük yoker makyonga arur aser iba yongji energu production kanga raksatsü aser tesem aika nung power makai nüburtem timtemtar.

Taoba hopta sepaitemi Ukraine indang energy facilities, defence factories, railway infrastructure, air defences aser ammunition stocks amala tesemtem nung 35 ben amak, ta Russian Defence Ministry ajanga Honibarnü shia liasü.

Kyiv yimsüsür temi Russian energy aser industrial facilities raksatsütsü merangba nung telangzüba agüja April 20-27

tsüngta amak ta ashi.

Ano külen Ukraine-i Honibarnep drones amshia Russia indang Krasnodar regionnung aliba Ilsky aser Slavyansk oil refineries amak aser mi adokdaksü, ta Ukraine indang itdangiter osang ka ajanga ashi.

SBU security service ajanga item tesemtem amak aser kasa region nung Kushchevsk military airfield-a amak.

Anüolen tembar linük temi Kyiv dang Russia nungert totzü atsüba tesemtem mamaksü ajungshir, kechiaser Russia-i tayang kepzüksü aser alima nung totzü jenjang tali akumtsü bilemer.

Krasnodar region nung amakba sülen totzü atsüba tesemtem nung mapa inyakba anena lir, ta Russia ketdangsür temi ashi.

Kyiv-i Moscow den yimjung ken o jembitsü memulunger, anungji yimjung asoshi jembishinü akatsü nüngdak madoker, ta Kremlin odongtar Dmitry Peskov-i Honibarnüa nenshia ashi.

US nung Gaza rara anema longka aiba kaketshir aika puogo

Washington, Rongchii/April 28 (Agencies): Gaza nung ceasefire benoktsü aser Israel nem teyari agütsüba company tem dang ojang dang teyari agütsütsü khanga United States kübok university balala nungi longkak aita aliba kaketshir noklang aika puogo.

University aika nung Gaza Strip nung maneni bomb pokloktsüba aser US-i Israel nem military teyari agütsütsü anentsü khanga longkak tali aiba mapang, Honibarnü police temi college campus balala meita ao aser karibo kaketshirtem senshidaktsütsü atema chemical irritants aser tasers tem amshia liasü.

Boston nung police temi Northeastern University nung longkak aita aliba tesem ka azüngtettsüba mapang nisung 100 shi sota yua liasü. Social media post balala ajanga security force tem riot gear semer aliba aser ketdangsürtemi truck ka tesülen sükitem inoka aliba sayuogo.

X nung sangdong ka ajanga Northeastern-i ashiba agi, longkak aiteritem mongzüka aliba tesem azüngtetja aziükogogo aser campus nung inyaksangshi aki ama kümogo.

School-i ashiba agi, anogo ana tejakdang kaketshirtemi longkak ait tenzük, saka Northeastern den kecha sendaka maliba professional organizers tem arua densemba sülen tang iba jenjang agiogo. Kasa sangdong ajangsa, shirnokisa school indang ID sayuogo parnokbo chiokogo aser parnok anema jenjang agitsü saka temzüng ozüng dak ajemdakerbo jenjang magitsü, ta metetdaksü.

Midwest kübok Bloomington nung Indiana University Police Department-i nisung 23 puogo, ta Indiana Daily Student osang

kaket sangdong ka ajanga metetdaksü. Police temi campus nung longkak aitba tesem azüngtettsüba mapang nisungtem ya pua liasü.

Kasa mapang nung Arizona State University Police Department-ia nisung 69 puogo. Kaketshir telok kati campus nung temelaba memeshi longkak aitba tesem ka amenokba sülen iba jenjang ya agia liasü.

Arizona state ketdangsürtemi ashiba agi, longka aitba tesem toktsür aotsü atema aiben shiaka tashi mangai telok kati Hokolbarnü camp ka amenoka liasü. Longkak aiteritem ya timba ASU kaketshir, faculty mesüra staff tem liasü.

Kasa mapang nung St Louis kübok Washington University nung US presidential candidate Jill Stein aser la indang campaign manager densema nisung 80 puogo.

US ajanga nung university lenirtemi longkak aiteritem aziüktsü merangogo, saka maziükoteti arudar aser iba ya aziüktsü atema police temi tashiyim amshia arudar. Social media nung prokshiba video tem nung state balala nung faculty züngsemtem densema kaketshir noklang aika tashiyim agi apuba nguogo.

Longkak aiteritemi longkak aitba atema merenshiba mesüra mapa nungi aginba kaketshir aser faculty tem nem taitok agütsütsü khanga arudar. Hopta ka tejakdang New York nung Columbia University nung pro-Palestinian activists 100 dak tema pua liasü.

Columbia campus nung tenzükba sentong ya linük ajungai prokshia ao aser pro-Palestine longkak aiteritem aser free speech nokdangba atema kaketshirtem aser administrator tem tsüngda mangatetep

adokogogo.

Taoba anogo 10 tsüngda Yale University, University of Southern California, Vanderbilt University aser University of Minnesota densema college aika nung kaketshir noklang aika puogo, suspend sütsüogo, probation nung yuogo aser ken o kar nungbo college nungi mintokogogo.

University kar nungbo graduation sentonga thitsüogo aser kar nungbo longkak aiteritemi kitem atsüngba nguogo.

Princeton University, New Jersey nungi Al Jazeera osangbener John Hendren-i ashiba agi, longkak aitba atema kaketshirtem kanga akoksatsü akok.

"Kaketshirtemi risk tulu agidar. Parnoki university temzüng ozüng anema inyaksangshira parnok mintoktsü akok aser Princeton nungbo tuition taah küm nung USD 50,000 dak tema lir," ta pai ashi.

Princeton nung kaketshir Sam Bisno-i Al Jazeera dang ashiba agi, iba amala risk agiba ajanga kaketshirtemi iba ken o kanga süoki ia agiba sayur.

New York state kübok Cornell University nungi Momodou Taal-i ashiba agi, longkak aita aliba kaketshirtem karbo amokmerenogogo aser iba amala kaketshirtem atema school-i kecha tekümzüka magitsü. Campus nung camp amenokba atema Momodou ya Honibarnü khen atema suspend sütsüogo.

Kasa mapang nung Gaza nung Palestine nungert samatsütsü merangba anema longkak aitba ya Canada, Europe aser Australia nung school temia prokshiaogo.

Canada nung Gaza atema mezüngbuba camp ya Montreal nung Honibarnü McGill University nung amenoka liasü.

OFFICE OF THE
CHANGTONGYA KAKETSHIR TELUNGJEM
P.O. CHANGTONGYA-798613, DIST- MOKOKCHUNG
Regd. No. 908
"To Achieve Destination"

TENÜNGSANG AGÜTSÜR



Changtongya Kaketshir Telungjem (CKT) ajanga Wb. Moatoshi aser Wt. N. Tainla Jamir na jala Kr. IMKONGSENLA LKR-i 2024 HSLC tatidang nung Top-17 jenjang nung takok ngutetba asoshi la nem tenüngsang agütsür .
Tsüngremi ne taküm aser ne tazüngba wadang nung maneni moajangma.

Sd/-
Sb. Arensashi
President, CKT

Sd/-
Kr. Sashilemla
General Secretary, CKT

Injang-bomb ayudak sepai 20 pokset: Cambodia PM



Chbar Mon, Rongchii/April 28 (Agencies): Cambodia anüolen sepaitem aliba tesem ka nung injang-bomb ayokdak tesem ka poksaba lendong nung sepai 20 as, ta Ato Kilonser Hun Manet-i ashi.

Kampong Speu province kübok Chbar Mon district nung Honibar nikongdang atalokba lendong nungya sepai aika yiru, aser iba osang angashia kanga aoksar, ta Hun Manet-i Facebook sangdong ka nung ashi saka pai iba tatalokba indang tejangja mashi.

Iba lendong atalokba sülen iba tesem meketa security akangshiogo, kong anasa aliba ki aika raksa liasü.

Iba tesem anüker temi osangbener tem anasai marudaktsür.

Iba lendong atalokba tesem nung tangokba noksa kar nung ki aika kanga mejungi raksar liasü aser kilem ka poksar sepaitem mozüki ka nung temang anepaluba nguogo. Noksa kar nungbo anasa aliba ki kilem nung tapok adoker liasü.

Ki tilu pezü aser mapa inyakba tesem ka raksa aser mitkar indang garia aika raksa, ta army officer Col. Youeng Sokhon-i ashi.

Yimdaklir indang ki 25 raksa, ta paisa ashi.

Iba region nung danga linüktem ama Cambodia nungya

heat wave agi tim atemer aser Honibarnü iba lendong atalokba tesem nung temperature ya 39 C (102 F) liasü. Temperature tali akumba ajanga injang-bomb mapoker saka mapang talangka atsükba ajanga tapoktsü osettem maziükoteti akumer aser bomb tilaka apokba nungi mi adoka pokyonga aor.

Nikongdang 2:30 ako meta bomb tesashi ka apok aser iba sülen ghonda ka shi bomb tila apokba ola angashi ta anasa alir kari ashi.

2005 küm March ita linük northwest tsütsü Battambang jila nung hadir yua aliba tesem ka poksa aser iba mapang ghonda aika injang tila aser tulu pa-sasa khashishia nisung trok asü.

Injang-bomb junga anepalu mesüi rizünga ayuba ya alima ajuga nung tebilemtsü ka lir, ta Switzerland nung aliba Small Arms Survey ajanga 2015 survey ka nung shia liasü.

2013 nungi 2019 tsüngta injang-bomb rizünga ayuba tesemtem nung iba ama lendong 500 ben dak tali ataloka lir, ta ashi.

Cambodia Ato Kilonser Hun Manet ya West Point nung aliba US Military Academy nung graduate asü aser pa army commander inyaka lia taoba küm ato kilonser inyaktsü shim, shibai tebu Hun Sen melen.

Gillespie aser Kirsten na Pakistan tebur team head coach kumogo



Gary Kirsten

Jason Gillespie

Rongchii/April 28, 2024

(Agencies): Taoba mapang South Africa nungger batter aser coach Gary Kirsten, limited overs cricket nung Pakistan tebur cricket team head coach kumogo aser taoba mapang Australia nungger fast bowler Jason Gillespie, Test team head coach kumogo.

India nung ICC Cricket World Cup 2023 nung Pakistan team pongububa nung tembangba sülen coaching staff, captain aser management nung temelenshi aika adoka ita aika mepetmesü nung aruba sülen Pakistan Cricket Board (PCB)-i Deobarnü iba osang ya sangdongogo.

Gillespie, shibai Test 71 aser ODI 91 nung asayaogo, pai South Australia indang coach mapa toktsütsü.

Taoba mapang Pakistan nungger all-rounder Azhar Mahmood shiba taoba mapang coaching set-up nung densema liasü, pa format ajak indang assistant coach kumogo.

Kasa mapang nung Kirsten, shiba lenisüba nung India team-i 2011 kum World Cup koka liasü aser South Africa tebur team coach mapa inyakba den club aika nung coach mapa inyakogo, pa Indian Premier League (IPL) team Gujarat Titans coach mapa toktsüba sülen Pakistan team limited

overs asaya coach akümtsü.

Taruba T20 World Cup 2024 aser tanga white ball asayamungtem dak alia Kirsten lenisüba nung Pakistan team taruba kum linük nung ICC Champions Trophy 2025, T20 Asia Cup 2025 aser India o Sri Lanka na nung ICC Men's T20 World Cup 2026 asayatsü.

Gillespie lenisüba nung Pakistan team mezüngbuba August ita ICC World Test Championship fixtures nung shilem ka ama Bangladesh den asayatsü aser iba sülen 2024-25 season nung England (Pak nung October ita) aser South Africa (December ita SA) den asayatsü.

Madrid Open: Nadal aser Iga Swiatek na tasembuba roundi iogo



Rongchii/April 28, 2024

(Agencies): Madrid Open tebur kija asaya nung Honibarnü Rafael Nadal-i 7-6 (8/6), 6-3 agi Australia nungger asayar Alex de Minaur koka Barcelona nung tamakok anguba küpzükogo. Ajisiüaka pa temaba jenjang nung akhi ama asayatsü asoshi mapang agitsü, ta Nadal-i ashi.

Nadal taküm tatembangbuba asayar aser pa hopta ana tsüngda De Minaur den tanabenbuba asayaogo, ajisiüaka Madrid nungbo pai Minaur koka tasembuba round tongtetogo, kong pa Argentina nungger

asayar Pedro Cachin den asayatsü.

Madrid Open ponguben tashi koker alisang Nadal-i ashiba agi, pa taruba hopta Rome nung asayaba sülenang French Open nung asayatsü masayatsü jangjatsü. Pa tangar den toktepa asayatetsa jenjang ka tongtet nungger iba asayamung nung shilem agitsü, ta Nadal-i shiogo.

Tebur kija asaya nung Stefanos Tsitsipas bo tanabuba round nung world number 118 Thiago Monteiro-i tsükdaktsüogo. Monteiro-i iba asaya ya 6-4, 6-4 agi koka liasü.

Greek nungger world number seven asayar ya mezüngbuba round atema bye angu aser taoba hopta ana tsüngda Monte Carlo nung takok anguba den Barcelona nung tanabuba jenjang tonga asayatetba sülen iba asayamung nung asaya saka mezüngbuba asaya nung tsükogo.

Kasa mapang nung top seed Jannik Sinner-i 6-0, 6-3 agi Lorenzo Sonego ayong ayonga koka tasembuba round-i iogo.

Tebur kija asaya nungsa Daniil Medvedev-a tasembuba round-i iogo. Pai tanabuba round nung Matteo Arnaldi 2-6, 6-4, 6-4 agi kokogo aser pa tasembuba round nung America nungger asayar Sebastian Korda den asayatsü.

Kasa asayamung tetsür kija asaya nung Iga Swiatek-i, 6-1, 6-1 agi Romania tsür Sorana Cirstea ayong ayonga kokogo aser la round pezübuba nung Sara Sorribes Tormo den asayatsü.

Maneni Ons Jabeur-i, Canada tsür Leylah Fernandez 7-5, 2-6, 6-4 agi koka round of 16 tongtetogo.

US Open champion Coco Gauff-ia, 6-4, 6-1 agi Ukraine tsür Dayana Yastremska kokogo.

Uber Cup: India tetsür team quarterfinal-i iogo

Rongchii/April 28, 2024

(Agencies): Deobarnü tang asaya aliba Uber Cup badminton tournament nung group A nung Singapore 4-1 agi akokba sülen India tetsür team quarterfinals-i iogo.

Asian champions India, shirnoki mezüngbuba round nung Canada 4-1 koka liasü, parnoki Deobarnüa kanga junga asayaogo, kechiyong Ashmita Chaliha-i mezüngbuba asaya makokba sülen parnoki tanungba asaya pezüprongla koka liasü.

Iba asayamung nung India tsürtem rongnung asayar tejentem aika mali saka lanur asayartemi kanga jung asaya-a asaya ana tashi kokogo.

Group A nung ano tanga asaya ka nung China-i 3-0 agi Canada kokogo aser parnoka quarterfinal-i iogo.

Asaya ana akokba sülen India team Group A nung China sülen tanabuba jenjang nung lir. Team ana ya Mongolbarnü asayatsü.

Chaliha shibai Honibarnü

Canada tsür Michelle Li koka liasü, lai Deobarnü world No. 18 Yeo Jia Min 15-21, 18-21 agi mekoki liasü.

Iba sülen national champions Priya Konjengbam aser Shruti Mishra nati tarep asaya nung 21-15, 21-16 agi Xiao En Heng aser Jin Yu Jia na koka liasü.

Tanabuba kija asaya nung Isharani-i, 21-13, 21-16 agi Insyirah Khan akok.

Maneni tanabuba tarep asaya nung Simran Singhi aser Ritika Thaker nati 21-8, 21-11 agi Yi Ting Elsa Lai aser Zan Michelle na koka 3-1 agi India team tejakdang aküm.

Kija asaya tasembuba nung Anmol-i, 21-15, 21-13 agi Lee Xin Megan madak takok ngua liasü. India team-i 1957, 2014 aser 2016 kum Uber Cup semifinal tonga asayaogo.

Kasa mapang nung Defending champions India tebur team group C nung Hombarnü England den asayatsü. India team-i mezüngbuba asaya nung Thailand team 4-1 agi kokogo.

Archery World Cup: India tebur team-i gold angu



Rongchii/April 28, 2024

(Agencies): Indian tebur recurve team nung Dhiraj Bommadevara, Tarundeep Rai aser Pravin Jadhav nunggeri Deobarnü reigning Olympic champions South Korea team koka kum 14 sülen Archery World Cup nung gold medal nguogo.

India tebur recurve team-i tang mezüngbuba World Cup final ka nung Korea team kokogo aser iba ajanga taruba Paris Olympics nung asayatsü atema parnok jenjang tajungba akümtsü.

Dhiraj, Tarundeep aser Pravin nunggeri final asaya nung kanga süngjemshir asaya-a Korea team nem set ka danga mokokdaktsü liasü.

Final asaya nung India team-i asaya 5-1 (57-57, 57-55, 55-53) agi koka gold medal nguogo aser iba ya densema India nungger aayartemi tang asaya aliba Stage 1 World Cup nung

ajak senteper gold medal pongu nguogo.

Kasa mapang nung tarep temeyoktep asaya nunga Ankita Bhakat aser Dhiraj nati 6-0 (35-31, 38-35, 39-37) agi Mexico nungger asayar Alejandra Valencia aser Matias Grande na koka bronze medal nguogo.

Ajak senteper iba asayamung nung India team-i tang tashi nung gold pongu, silver ka aser bronze medal ka ngua lir.

India nungger asayartemi paris Olympics atema tang tashi nung quota ka dang nguteta lir. Dhiraj-i tebur kija asaya nung quota ka nguteta lir.

Olympic qualifying event tatembangbuba ya Antalya, Turkey nung June 18 nungi 23 tashi Stage 3 World Cup asayatsü aliba ya asütsü. Iba asayamung tembangba sülen tang mezüngbuba team rankings dak ajemdaker quota talila ana agütsütsü.

BILEMDANGANG

"Süngdong tajung nung süngjang tamajung atangtsü tamakoktsü."